



# Massa infurmaziuns en rumantsch

www.ch.ch: il nov portal svizzer

■ (anr/ld) Ina massa infurmaziuns en rumantsch pon ins retrair sut il nov portal da la confederaziun: **www.ch.ch**. Il cussegl federal sustegna quest project da la chanzlia federala. El ha incumbensà quella da far ina convenna correspondententa davart la collavuraziun cun ils chantuns per ils onns 2007–2010. La pagina iniziale dal portal svizzer d'internet dat ina survista davart persunas, interpresas, autoritads federalas ed infurmaziuns concernent la Svizra. Plinavant pon ins s'infurmar davart noss dretgs politics en la confederaziun, nossas autoritads e problems actuals sco la gripa d'utschels u il nov attest da pajaja. Infurmaziuns en rumantsch dat quest portal plinavant davart ils datums da las sessiuns dal parlament, da las proximas

voraziuns federalas ed actualitads politicas. Natiralmain che la purschida d'infurmaziuns en rumantsch è pli pitschna che quella en ils auters linguatgs uffizials, perquai vegn alura renvià a la purschida en tudestg u franzos.

## Avischinaziun tranter burgais ed autoritads

Ier ha la chanceliera da la confederaziun, *Annemarie Huber-Hotz*, infurmà las medias a Berna davart la purschida actuala ed il svilup dal portal svizzer ils proxims onns. En vista a l'actuala inundaziun cun infurmaziuns saja da gronda muntada in portal che dat als burgais ina pussaivladad da chattar las infurmaziuns giavischadas tenor temas e relevanza en curt temp. Il portal svizzer dettia era in ma-

letg da noss pajais e procura per ina atgna identitad. Quest portal che stat a disposiziun di e notg muntia era ina contribuziun en favur da l'avischinaziun tranter ils burgais e lur autoritads, ha Huber constatà.

Il nov portal porschia era interessantas infurmaziuns per las interpresas e las autoritads, el dettia era ina survista da las piazzas vacantas tar la confederaziun. Ils chantuns e las vischnancas restian vinavant autonomas, han ils represchentants dals chantuns punctuà. En lur parais han els exprimì la necessitad d'in sistem modern d'infurmaziun e renconuschì la buna collavuraziun cun las instanzas federalas. Ils custs per il nov sistem d'infurmaziun èn calculads sin var 2 milliuns francs l'onn.